



Aadie Basel

Mir alli kennt-e mit Dir wette
au Du bisch nimme z'rette
de bisch zwoor jetzt grad doo
duesch is aber gli verloo
de duesch jo gar nit in Basel woone
will sich das jo nimm duet loone

Aber an dr Fasnacht denne
duesch wider uf Basel renne
die drey scheenste Dääg wotsch denn nit misse
dorum het-s au di zrugg uf Basel grisse
s'Scheene wotsch ainewäg gniesse
wägge dämm hesch usem neye Woonort miese

Mir wisse nit, läbsch jetze bi de Rammel
in Schönebuech oder gar in Ammel
bisch emänd dusse bi de Schwoobe
im Elsass oder gar im Jura oobe
hets di ins Fricktal oder no Dornach verschlaage
bisch im Sundgau dehai oder emänd in Baade

Uff iede Fall wotsch bi uns nit me verstyyre
zaalsch lieber in Euro, Mark, Franc oder Liire
will de maintsch in Basel kenn-me nimme lääbe
s'isch nimme grien und dorum läbsch jetz in de Rääbe
Au bruuchsch kai Parkplatz me sueche
dusse, bi de Baselbieter Rueche

De hesch dr Stadt Basel dr Rugge kheert
will di emängs in Basel steert
die wo kenne umgoo mit beese Gwalte
die deerfe die in Basel bhalte
und au dr Filzer Franz
wotsch du nit uf dr Hülfteschanz

Basel söll alles Beese bi sich bhalte
au alles zaale: fir die Junge und die Alte
du bisch besser dra und schlichsch di ewägg
und losch Basel zrugg im Drägg
die sölle jetze elai mit allem fertig wärde
sitze bliibe uf em Gschtangg und de Schäärbe

As de as Junge profidiere hesch kenne
wotsch jetzte nimme anerkenne
de duesch lieber nur no nä und nit me zaale
nur no glaini Stytre und die zaalsch jetzt in Wahle
und kunnsch emoll uf Basel duesch reklamiere
wenn die dir kai Parkplatz reserviere

Schliesslig hesch Basel jo verloo
will de nit im Stau wotsch stoo
und will dr d'Luft z'stargg duet stingge
z'viil Usländer enand dien zuewingge
z'viil Lärm isch und z'viil Krach
und z'vill Lyt woone unter aim Dach

Und pletzlich, de mergsch-es de bisch scho fascht elai
dini Kinder sin scho alli nimm dehai
wirsch älter und duesch afoo anderscht dängge
mergsch au, dass sie dr uff em Land au nit schängge
fir alles bruchsch e Kaare
as de naime kasch aane faare

Fääle dien dr au die alte Kollege
und de kasch di nimme so guet beweege
wie scheen wärs doch de wärsch in dr Stadt
de weisch-es no, dert isches immer glatt
triffsch e alte Frind oder im Kolleeg si Babbe
und kasch schnäll z'Fues ain go schnappe

De duesch au nit riskiere
as si dr s'Billet ykassiere
und es länggt au immer no ebbis go z'kaufe
will de numme kurz hesch und kasch laufe
dr Lärm duet di au nimme steere
de bisch froo as de no ebbis duesch heere

Mi lieb Basel: nimsch mi wider zrugg
i stand jo so gärn uff diiner Mittlere Brugg
wurd so gärn in dr Freie flanlere
wott nimme nur hi und häär pressiere
i kaa's sälber nimm verstoo
as i di sällbetzmool ha sitzeloo ...

D Ladärneuusstellig isch vom Mändig znacht, em 22. Hornig, bis am Mittwoch demorge, em 24. Hornig, fir alli Bsuecher gratis offe uff em Minschterplatz.